

東
華
續
錄

東華續錄

同治三十八

臣王先謙敬編

臣張式恭恭校

九月己亥朔諭議政王軍機大臣等李鴻章奏甯國等處安界內擊敗賊股情形一摺據稱劉銘傳等廣德克復後卽率黃桂蘭等三路追剿賊被官兵殲斃解散者甚眾黃汶英挾洪幼逆竄赴績溪一路堵逆黃汶金已槍斃於陣等語前據左宗棠奏黃汶英亦經殲斃洪幼逆及偽祐王李遠繼尙在稽誅左宗棠當仍遵前旨督飭諸軍密速購捕並將逸出之賊分路搜擊幼逆究竄何處是否殲斃及輔逆逃往上海是否確實均著左宗棠李鴻章查明具奏李鴻章派出各軍已分布廣德建平東壩溧陽宜興等處卽著飭令扼要嚴防如浙皖兵力不敷剿辦仍著派兵出境會剿以

期迅速藏事藉固蘇省藩籬另片奏蘇省餉需艱窘情形擬於陸軍六萬人內分別裁撤酌留三萬人以資扼守等語因念裁撤勇丁固爲節省餉需起見第辦理稍有未善深恐流弊滋多卽如前日官文所稱撤勇過境本省必需分留營座沿途鎮撫彈壓等語可見裁勇一事經過各處辦理甚難見在東南軍事將竣裁撤勇丁一事固應及時辦理惟見在用兵省分招募勇丁者尙多憚世臨曾有募勇防邊之奏而僧格林沁近因剿辦髮捻各逆亦擬添募步勇補馬隊之不足雷正綰在蓮花城剿辦回匪亦請募勇增兵毛鴻賓等亦有招募楚勇防守邊陲之議各該處所招募者難保非卽係各省裁撤之勇與其募已散之勇辦理殊費周章不如就未散之勇令原管將官統帶回籍如經過募勇省分卽可截留應用否則酌量何省需用卽撥往何省旣無慮沿途擾累又可免

各省零星招募之煩係一舉兩得之事此項勇丁卽或募勇各省不能全數畱用而帶回原籍遣散較之隨地遣散亦屬妥協以上各節著曾國藩左宗棠李鴻章斟酌情形妥籌辦理江皖一帶防兵足敷扼守金陵一軍卽可派至皖北會剿楚皖各界之匪庶兵力厚集易於得手並著曾國藩等迅速籌辦將此由六百里各諭令知之○甯夏將軍慶昫奏移營納家牐迤西扼要以分賊勢而進糧道得旨著慶昫督飭在城在營各將弁實力堵扼一俟杜嘎爾等軍聲勢聯絡卽行奮勇進攻以收夾擊之效常陞紮營隘口藉通郡南運道惟兵力甚單孤立一營甚屬可慮務令其專疏糧道時刻嚴防不可輕率出戰致有疏虞○予湖北殉難通判沈耀鏊祭葬世職○庚子諭內閣譚廷襄奏搶辦中河廳十三堡險工繪圖呈覽一摺據稱中河廳十三堡潰隄圈刷之處搶辦後緣因

灘係純沙隨築隨塌擬於退後數十丈見築圈埝之處加高培厚再將先年老越隄補築完整以作重障惟趕築圈埝長三百餘丈補修老越隄原長七百七十八丈力爲收縮尙有六百餘丈擇節估計需銀三萬餘兩查每年例儲春伏二汛防險銀三十萬兩上年僅撥銀十一萬兩節省銀十九萬兩請提撥見銀三萬兩俾資趕辦等語中河十三堡存灘被刷驟出奇險見雖搶辦漸臻底定而築埝修隄旣據譚廷襄奏萬分緊迫自未便稍涉延緩致誤要需著張之萬督飭藩司於上年春伏二汛節省銀兩內提撥見銀三萬兩俾供支放至石家橋鄭下汛九堡刷塌隄邊二十餘丈亦關緊要卽照譚廷襄所擬認真辦理譚廷襄於前項要工惟當督飭屬員實心經理務期工堅料實毋得稍涉草率圖畱覽將此各諭令知之○諭議政王軍機大臣等楊岳斌沈葆楨奏肅清瀘溪

克復新城甯都解圍收復雩都縣城各情形並籌分路追剿諸賊
皖南各摺鮑超派唐仁廉由金谿西鄉進剿瀘溪之賊敗匪向新
城竄去瀘溪一律肅清鮑超探知渡逆汪海洋與利逆朱興隆等
圍聚新城遂親率馬步各隊奮力克復又復追剿大勝陣斃賊目
甚多宜黃竄匪圍攻甯都州守備賴永福等與在城文武擊退州
城圍解賊陷雩都王文瑞率勇力戰收復均屬奮勉在事尤爲出
力及甯郡守城各員均著楊岳斌沈葆楨擇尤保奏侍逆李侍賢
前在崇仁被礮擊傷左膀嗣又糾合宜黃敗匪竄撲甯郡並陷雩
都爲王文瑞擊走遂遁往信豐縣境因江忠朝一軍在東路防守
嚴密復繞由廣東南雄州邊境突犯南路之新路口乘隙撲南安
府城江忠朝令徐生德先往援剿楊岳斌見亦抵贛著卽督飭各
軍兜擊務須殲厥渠魁以次掃除羣醜毋任再有延蔓該處與廣

東處處毗連如有逸匪入粵著毛鴻賓郭嵩燾派兵扼要設防遇賊卽擊毋稍疏失汪海洋在新瀘等處經鮑超督軍追擊四次敗遁見踞瑞金縣境該縣通連會昌大路著楊岳斌等飛飭席寶田王文瑞兩軍兼程前進毋任再有他竄皖南之防最爲緊要楊岳斌等已派劉典率所部暨王開琳等營同赴徽甯擇要扼守該處本有防兵見在洪幼逆等仍在皖浙之交冀圖負隅死拒左宗棠已派兵窮追著卽懷遠疊次諭旨飭諸軍認真接剿曾國藩當飭皖南守將會江浙諸軍合力殄除爲一勞永逸之計鮑超一軍卽令暫駐建昌防瑞金各匪回竄並堵湖州餘逆西窺伺隙卽剿以竟全功楊岳斌已屢諭馳赴陝甘總督新任何以尙未接奉前旨著卽趕緊部署遵照前旨酌帶勁兵數千赴任剿辦回匪以慰朝廷西顧之憂江西各路未竟事宜卽交沈葆楨鮑超劉典等妥爲

辦辦江與湖南一水可通恐該匪意圖竄往該省著惲世臨督飭地方文武認真籌辦防剿毋令闖入本境是爲至要將此由六百里各諭令知之○廣江西南安府學額五名鄱陽縣十名南康九名江蘇海州六名靖江二名湖北黃安一名○辛丑諭內閣李雲麟奏積勞病劇請回旗調理一摺李雲麟以候補郎中經朝廷不次超擢以四品京堂候補辦理陝南軍務宜如何實心任事奮勉圖功力求報效乃自到陝後迄今一年有餘於一切防剿機宜所行不逮所言毫無成效可觀茲復以寒暑積勞率行告病並連請回旗調理殊屬有負委任李雲麟著革去四品京堂卽行回旗仍以郎中候補用示薄懲○左宗棠奏賊竄涪安威坪蜀口等處官軍截剿疊勝羣賊退踞涪安所轄唐村黃金嶺一帶意欲越嶺竄逸八月十四日昧爽黃少春飭副將張福齊等率所部夾徵港

而上會合遊擊黃元吉各營分路齊進縱橫盪決鏖戰踰時賊勢不支紛紛潰竄官軍乘勝追殺陣斬及墜崖死者約四五千名生擒數百名拔出難民萬餘追至歙道交界之門嶺始收隊而還時劉榮合等四營亦由昌化躡蹤追至將沿途尾賊搜斬淨盡其前隊五千餘人已由歙境大洲源繞出建口過河十五夜逆賊大股復由建口涉淺渡過萬餘人其未過河者尚不下二萬人正向上下兩灘搶渡劉明燈張福齊等各隊繞出賊後分路夾擊適皖南鎮總兵唐義訓所部亦由歙南馳至四面兜殺逆賊無路奔逃陣斬僞列王邱國汶等多名其餘被剿窮蹙乞降者約六千餘人餘逆向績溪一路翻山遁去者僅數百名後路已無賊蹤其先由歙境建口渡河一股亦經黃少春率營進剿殺賊無算餘眾悉赴黃少春軍前乞降見已分別酌畱遣散勿令滋生事端其祐逆李遠

繼自甯國敗竄後收合殘黨千餘此次聞劉得義投誠其黨一開而散李遠繼隻身遁走見洪幼逆等已繞由遂安昏口一路逃竄黃少春亦卽率部跟蹤緊追官軍可迎頭截擊者尙有駐馬金街之劉明珍一軍駐婺源之王開榜兩軍又准楊岳斌沈葆楨來咨已商令劉典一軍迎剿當可悉數殲除 上諭議政王軍機大臣等竄賊向績溪翻出遁去者僅數百名著仍督飭諸軍奮力追剿以清餘孽投誠賊眾妥爲安置前據奏報洪福瑱將髮髻髻裝扮洋人意圖潤竄見在祐逆李遠繼因黨與紛散隻身遁走洪幼逆等已繞由遂安昏口一帶逃竄著左宗棠懷遵疊次諭旨檄令劉明珍等軍嚴密購捕務在必獲以膺懋賞斷不可任令免脫祐逆逃往何處並著嚴飭諸軍認真追捕劉典等已由楊岳斌派赴徽甯扼守要隘著卽飭令將此股賊匪迎頭截擊悉數殲除毋令再

擾江境又成蔓延之勢將此由六百里諭令知之○諭官文奏官軍移營擊賊獲勝見飭約期會剿追賊出境一摺蘄羅賊匪經成大吉等分路痛剿殲匪無算直追出大小界嶺始行收隊該逆復在大坳冲及羅田離城二十餘里之黃泥塘地方意圖分竄復經石清吉等迎剿匪勢窮蹙訊據賊供七區之賊備有行糧有將遁走之勢昨據僧格林沁奏該逆竄入楚境大山向南竄突麻城黃安應山一帶路路可通是該逆游魂無歸見在分路狂奔尙無定向著官文檄飭成大吉與富森保石清吉等軍約期再舉乘勝進攻仍遵前旨將該逆就地殲除毋畱餘孽如該逆竄出山險卽著曾國藩喬松年督飭皖軍兩面夾擊協力掃蕩俟賊蹤竄近平原馬隊可以施展並著僧格林沁督軍兜剿悉數殲滅毋令再行紛竄他處英山之賊有分股由打虎廠圖竄蘄州等處之信著官文

卽飭譚仁芳由長嶺岡移紮張家塆嚴密防守以保蕲黃門戶並
著曾國藩喬松年飭令英山防軍跟蹤追躡以期聚而殲旃羅山
賊匪由朋興店擾至易家棚因蕭河清等軍踵至該逆知防有重
兵連夜向羅山竄走並據探該逆皆竄光息交界之剝皮河墨斗
關勞山一帶僧格林沁見駐羅山之南關外正可派兵迎截並著
張之萬毛昶熙選派勁旅會籌剿洗迅殄逆氛曾國藩於克復金
陵後心血過虧困憊殊甚前經諭令在營安心調理日來曾否就
痊朝廷甚深廑繫著曾國藩傳旨存問前諭曾國藩如不能赴安
慶卽派彭玉麟曾國荃等酌量帶兵分駐上游將來曾國藩由安
慶赴金陵後應否卽令曾國荃移紮上游以資控扼之處卽著懍
遵前旨酌量奏聞正在寄諭閒據張之萬毛昶熙奏剿辦東路股
匪獲勝六安之賊復圖回竄西路之賊南竄麻城各情形與僧格

林沁官文所奏略同既據張之萬等奏稱將士出境援剿轉戰半年傷損實多所部兩營實無可調之隊卽著張之萬毛昶熙就前敵見有之兵力加整頓飭令聽候僧格林沁調遣實力防剿毋任回竄仍一面將添募練勇迅速訓練成軍以厚兵力將此由六百里各諭令知之○諭李雲麟奏蔡啟敗匪奔竄甘省遵旨遣回楚軍並將隴軍酌量裁撤一摺蔡啟兩逆自陝北入山屢經官軍擊敗見竄甘肅階州之西和縣等處劉蓉所部各營已追至甘界並經駱秉章調湘果兩營扼紮陽平關朝天關等處防剿賊勢已蹙惟甘肅階州文縣一帶在在與川省毗連深恐敗匪鋌險闌入蜀疆著駱秉章劉蓉督飭諸軍盡力夾擊務將蔡啟餘匪就地殄除毋任再行紛竄至李雲麟所部之軍除業經籌給餉銀遣撤回楚外見畱業健中前後三營暫紮陝楚交界之漫川關並隴軍歸化

歸義兩營李雲麟擬卽全行遣撤著劉蓉悉心籌畫見紫漫川關之穀健三營或須畱防陝楚毗境或可籌給餉項卽行遣回均卽迅速酌辦並飭李雲麟將隴軍妥爲遣撤毋令滋生事端李雲麟移交劉蓉管帶之三營並水軍等尙有若干人均著劉蓉派員統帶妥爲調度興商一帶如尙須派兵扼防並著劉蓉妥籌兼顧蔡啟二逆勢已窮蹙劉蓉見已追入甘境近日剿辦情形若何著一併迅速具奏甘省回氛甚熾著穆圖善懷遵疊次諭旨迅卽起程赴甘與都興阿雷正綰會籌進剿毋許再有延緩本日據官文奏請飭總兵顏朝斌赴鄂隨營等語著駱秉章傳知顏朝斌於補行穿孝百日屆滿卽行馳赴湖北軍營隨同官文辦理防剿毋稍稽延將此由六百里各諭令知之○諭都興阿奏前敵布置情形並請調西安滿兵各摺片據稱前敵各軍克復寶豐後聯絡平羅進

紫渠口堡一帶時出雕剿頗有斬獲惟後路空虛兵力不敷分布該逆見聚清水堡兩岸阻我進攻之路等語杜嘎爾一軍攻克寶豐後乘勝進剿軍威頗振惟該處地勢寬廣官軍節節深入後路糧道最關緊要此等兵力未厚自當穩慎進取步步爲營不可稍涉大意儻有隙可乘卽卽激勵將士相機進剿以期迅掃賊氛慶昫仍當督飭將弁固守甯夏城池並著知照進規納家牖之常陞一軍務須嚴密穩固並隨時偵探期與都興阿所派之兵遙爲聲援一俟杜嘎爾一軍逐漸趨聲勢可以聯絡卽著合力夾擊以竟全功前因固原復陷平涼一路軍情喫緊業經諭令穆圖善統帶所部赴甘會商都興阿等應由何路進兵相機辦理本日復經寄諭催令迅速前進仍著都興阿俟其到營妥籌進兵都興阿所請調撥西安駐防滿兵五百名赴甘演習洋槍著德興阿卽行挑

派星速前往儻因西安城防緊要不能如數派往卽著酌量調撥如實係不敷可卽咨明都興阿由都興阿另行籌調將此由六百里各諭令知之○壬寅諭內閣前據曾國藩奏稱曾國荃於克復江甯後患病欲請回籍當經諭知曾國藩傳旨存問卽令其駐紮江甯安心調理毋庸遽請開缺回籍茲復據曾國藩奏曾國荃病勢日增必須靜養方能早就痊愈據情代奏懇請開缺回籍等語浙江巡撫曾國荃自隨同曾國藩剿賊以來疊克名城勳績卓著本年親督將士苦戰數月攻拔江甯省城殲除巨逆厥功尤偉乃以連年辦理軍務心力交瘁遂致憂勞成疾請假開缺回籍調理情詞極爲懇摯若不俯如所請惟恐爲職守所羈未能從容靜攝轉非體恤功臣之道曾國荃著准其開缺回籍調理並賞給人蔭六兩交該撫祇領用資保衛該撫係有功國家之臣朝廷正資倚

昇尙其加意調治一俟病體痊愈卽行來京陛見○諭議政王軍機大臣等曾國藩奏湖州廣德敗賊竄犯歙南官軍截剿屢勝並彭玉麟督帶水師不能專駐安慶及江皖近日軍情暨曾國荃病勢增劇代奏懇請開缺各摺片本日已明降諭旨准曾國荃開缺回籍該撫其安心靜攝善自保衛一俟病就痊愈卽行來京陛見以備倚任所有江甯省城一切善後事宜卽著曾國藩馳往江甯勘酌機宜妥籌辦理安慶地處上游控制皖南皖北旣據曾國藩奏彭玉麟總統水師事務繁重不能專駐安慶亦不能兼顧陸路安慶防守及善後等事飭馬新貽等會同妥辦可無疏虞卽著照所請行馬新貽已簡放浙江巡撫仍著曾國藩飭令該撫畱駐安慶同何璟等將應辦事宜妥爲籌辦務臻周密浙省撫篆見有左宗棠兼攝暫可無庸到任卽著曾國藩行知該撫可也皖北英霍

等處一片賊氛蔣凝學雖屢獲勝仗而糧路尙屬梗塞曾國藩見調劉連捷等率兵萬餘由桐城進剿英山調李榕王可陞何紹彩三軍八千人由六安進援霍山有此兩枝勁旅皖北軍務必可得手劉連捷等此時計已到防著曾國藩督飭該員等迅速進兵喬松年督率所部會合各軍實力埽蕩盡殄賊氛毋令紛竄曾國藩回駐江甯後距英霍較遠所有派往該處援應各軍自應有所統率俾令事權歸一曾否酌派有人抑仍由該大臣遙爲控制之處著隨時酌量奏聞湖州廣德敗賊併犯歙南經易開俊唐義訓各軍併力堵剿俘斬降散爲數甚眾曾國藩當飭令乘此聲威將此股竄賊就地殲除昨據左宗棠奏唐村黃金嶺一帶竄賊經黃少春等痛剿撿斬甚多此次歙南諸軍又獲大捷著左宗棠督飭在事員弁奮力追擊以清餘孽曾國藩本日所奏江西軍情與楊岳

斌等前奏大略相同卽著曾國藩左宗棠督令皖浙各軍會合鮑超劉典等軍將敗殘竄匪前後夾擊埽除淨盡以竟全功而膺懋賞將此由六百里各諭令知之○以馬新貽爲浙江巡撫未到任前仍以閩浙總督左宗棠兼署英翰爲安徽布政使何璟爲安徽按察使由盧鳳道遷○予安徽陣亡遊擊唐遠昆祭葬世職○癸卯諭議政王軍機大臣等穆圖善奏督師赴甘請調赴鄂舊部劉蓉奏敗匪紛竄階州督軍越境窮追遵飭張集馨曹克忠赴甘及因病懇請開缺各摺片甘省回氛日熾軍情緊要穆圖善見已督率馬步各營陸續進發惟後起步隊尙須俟有餉銀方能西上著劉蓉督飭糧臺迅速籌款給發俾利遄行甯靈一帶地方平曠利用騎兵穆圖善所部馬隊僅金順兩起三百名實屬不敷分遣其前調赴鄂之溫德勒克西兩起馬隊本係穆圖善舊部且皖楚交界山

路崎嶇稻田遍野馬隊難以展布不如調赴甘省用其所長較可
得力著官文酌量調派至蘇倫保兩起馬隊及藍斯明四營步隊
能否一併飭赴甘省之處並著斟酌軍情妥籌辦理穆圖善勇往
直前深堪嘉尙本日已明降諭旨令其幫辦都興阿軍務該將軍
務當益矢忠勤兼程入甘與都興阿和衷商辦盡力勦洗肅清邊
陲以副委任蔡啟等逆業經蕭慶高等督軍追躡疊獲勝仗擒斬
收降匪黨甚眾餘孽狂竄階州劉蓉見檄林之望力扼要隘並飭
蕭慶高等越境窮追辦理尙屬認真此股敗匪見在猛撲畢口急
圖入川蕭慶高等已繞出甯羌截勦駱秉章當督飭川軍會合陝
軍分途兜擊就地殲除毋令紛竄入川致形滋蔓曹克忠一軍見
已拔隊赴甘既可爲雷正綰後路聲援並可兼顧隴防第該營中
有新收降卒必須嚴加鈐束隨時防範毋稍大意張集馨所陳通

籌全局謂議撫緩兵糜餉老師不如先機決策一勞永逸等語前據雷正綰奏固原降回復叛襲陷城池是該逆詭譎性成以乞撫爲緩師確有明證張集馨旣於同情知之甚悉必能操縱得宜著懷遵前旨馳往甘省相機籌辦不得膠執成心亦不必意存遷就雷正綰傷口已否平復甚深屢繫見在逆氛復熾雷正綰務當與陶茂林迅籌進剿力挫兇鋒恩麟當振刷精神督率兵勇固守省垣認真剿辦河狄等處回匪不得一味畏葸因循貽誤軍事此時陝西境內雖已肅清而西固汧隴之防東嚴興商之守責任綦重劉蓉著毋庸開缺賞假兩箇月安心調理其重大軍情仍著力疾料理毋許推諉將此由六百里諭知官文都興阿穆圖善雷正綰駱秉章劉蓉並傳諭恩麟張集馨知之○諭廣鳳奎昌奏揀派蒙古官兵前赴古城一招據稱陸續調往杜爾伯特土爾扈特等處

蒙古官兵一千二十三員名派副盟長郡王淩扎棟魯布貝子察克都爾扎布公多果爾巴管帶赴古征剿等語卽著照所擬傳諭該盟長等統帶各項官兵迅速前進沿途妥爲鈐束不可稍事滋擾俟到古城時卽著保恒妥籌調遣所有軍火器械及官兵口糧務須籌款接濟毋令缺乏前據文祥奏奇台一帶之匪聞烏魯木齊變亂後圍困古城幸連獲勝仗舊城並未失陷見在該城軍情若何此項蒙兵是否精壯可用著保恒詳加遴選擇其驍健可效前驅者派員統率先剿古城一帶之匪再行救援迪化其烏魯木齊吐魯番等處回氛近日能否稍戢並著隨時查探具奏將此各諭令知之○命荊州將軍穆圖善幫辦署陝甘總督都興阿軍務○諭沈桂芬劉蓉每月各籌銀二萬兩及軍火等項解穆圖善軍○予甘肅陣亡總兵官蕭餘勝祭葬世職○甲辰諭內閣前因曾

國藩奏楊岳斌因父母年逾七十母病增劇遽情代請開缺回籍
養親當經降旨諭令楊岳斌俟克復金陵後再行請旨省親茲據
楊岳斌奏稱八月稱行抵贛州病體難支傷處復加痛楚心中怔
忡不止父母老而多病疾痛之餘思親倍切請開陝甘總督之缺
回籍調理等語楊岳斌統兵十餘年衝冒矢石力疾苦戰傷病交
作且其父母年皆七十有餘原應俯如所請俾資調理並遂其孝
養之忱惟前因甘肅逆氛不靖當授楊岳斌爲陝甘總督辦理剿
匪事宜見在甘省軍情關繫極爲緊要該督久歷戎行威望素著
軍麾所至疊奏膚功此時西北軍事孔棘朝廷正資倚畀自未便
遽令回籍楊岳斌著賞假一箇月在營趕緊醫治俟假滿後卽行
馳赴陝甘總督新任毋庸開缺○諭楊岳斌沈葆楨奏特參怯懦
玩誤縱勇擾害之帶兵各員請旨懲辦等語江西補用道王沐經

楊岳斌等派令自撫州移軍秀才隼防守並赴樂安一帶截剿竄賊節節逗遛罔顧軍情緩急所部勇丁沿途騷擾不能約束經撤去統帶抗不移交勇數名冊其營官運同銜知縣王安敦遊擊賀長春唐榮貴縱容勇丁索餉滋鬧該員並不彈壓實屬謬妄玩誤王沐著卽行革職從重發往軍臺效力贖罪不准藉端奏畱王安敦賀長春唐榮貴著一併革職交楊岳斌沈葆楨提訊縱勇確情從嚴懲辦新授雲南按察使席寶田疊經楊岳斌等催令援剿南豐甯都賊匪遷延不進藉詞延宕任賊遠竄實屬巧詐不力席寶田著降爲知府並撤去布政使銜撤銷勇號仍責令率勇剿賊以觀後效儻再延誤卽著從嚴參辦卽補參將劉勝祥所帶勇丁全無紀律所過村市任意擾害實屬約束不嚴劉勝祥著暫行革職責令嚴束各勇剿賊自贖儻再不知愧奮一併嚴參懲辦○諭議

政王軍機大臣等楊岳斌沈葆楨奏南安援師收復水城郡城解嚴又奏信防喫緊見籌進剿情形各一摺侍逆率眾直撲南安府城時援軍適至該逆縮入水城提督江忠朝知府黎兆棠等督軍力戰克復水城賊匪逾嶺遠遁郡城危而復安在事出力各員實屬異常奮勉著楊岳斌沈葆楨擇尤保獎以示鼓勵此股賊匪悉趨粵境官軍追至南雄州之槐花灘斬獲不少楊岳斌等以江西尚有賊蹤徽甯亦有竄匪兵力難以出省擬俟信豐瑞金湖州各路竄匪翦滅後再行確探前股趨向飭各營越境會剿惟侍逆係賊中最狡悍之股見在窮蹙竄粵若粵兵迎截江軍跟追不難一鼓殄滅否則任其所之養成羽翼必致又形費手著楊岳斌沈葆楨迅速調派勁旅出境追剿毛鴻賓郭嵩燾當懷遵疊次諭旨派兵迎擊務將侍逆一股悉數殲除梅嶺南雄均與湖南接壤著惲

世臨嚴飭在防各軍認真會剿共埽寇氛如令闌入完善蹂躪地方必惟各該督撫是問江西信豐尙有賊氛汪海洋大股在瑞金境內楊岳斌卽飛催韓進春席寶田等軍實力進剿王沐等已照會督撫所請分別懲處席寶田向來打仗尙肯出力此次以知府降補如自知愧奮仍由該督奏乞恩施儻始終怙過無裨戎行卽著據實參奏毋稍姑容皖南餘匪已由開化之華埠闖入江境距玉山僅三四十里鮑超適赴省就醫聞報力疾啟行奮勇可嘉著楊岳斌等卽飭該提督出貴溪金谿之間確探賊蹤迎頭兜剿劉典由撫州到省見率所部由東鄉進發已抵貴溪卽著飭令會同信防各軍實力夾擊務將全股撲滅毋任再有逃竄楊岳斌另摺奏舊疾增劇請開缺調理等語本日已明降諭旨賞假一月調理俟假滿後仍遵前旨帶兵赴任誠以西北形勢甲天下非文武兼

資不足膺此重寄該督威望素著必能底定巖疆殄除羣醜該督
一日不赴甘則都興阿一日不能出關剿賊西陲大局將不可問
該督當勉體朝廷不得已之苦衷力圖報稱以副厚望將此由六
百里各諭令知之○以趙煥聯爲雲南按察使記名按察使○予江西
陣亡參將譚茂高李竟成等祭葬世職○乙巳諭議政王軍機大
臣等前因陝西調回湖北之溫德勒克西兩起馬隊及蘇倫保兩
起馬隊藍斯明四營步隊昨因甘肅回氛日熾諭令官文將前項
馬步各隊酌量飭赴甘省諒該大臣已妥爲調度本日復據常清
由八百里馳遞據稱葉爾羌回變被陷英吉沙爾喀什噶爾兩城
武弁謀叛烏魯木齊城圍未解請催調內地精兵援剿等語前授
楊岳斌爲陝甘總督令其帶兵赴任昨據奏到江西軍務未竣兵
不能分該督亦因病奏請開缺已賞假一月調理本擬俟楊岳斌

到任後酌撥甘肅兵將出關助剿今楊岳斌既不能即日赴甘是甘肅情形仍形危迫穆圖善已帶所部赴甘著官文卽遵照本月初五日諭旨速將溫德勒克西等及蘇倫保馬隊派往甘肅交穆圖善統帶藍斯明等步隊如楚省軍情稍鬆可以調撥亦著派令赴甘以資得力以上各起馬步著官文於接奉此旨時迅速遵旨酌量調派不准藉詞奏留麻城餘匪仍有若干曾否復竄豫境近日軍情若何著僧格林沁官文隨時具奏東竄英霍之賊業經曾國藩調派劉連捷等營迎剿該逆不能逞志於皖必再犯鄂官文務飭各軍盡力防剿毋任回竄勾結見在東南大局雖定西北軍事方殷新疆地方關繫緊要邊城處處傳烽勢將不可收拾僧格林沁老成宿望視國如家必有救時良策不妨剴切敷陳以備採納將此由六百里加緊各諭令知之○諭勞崇光張亮基奏兵飢

餉竭請飭酌籌接濟教匪滋擾思南松銅各屬委沈宏富募練勦辦請飭周洪印馳往荔波獨山等處會勦桐梓失陷卽復各摺片包伍等逆以一股牽掣印江一帶徐河清等軍一股竄松桃廳屬之大坪場等處疊撲廳城經官軍擊敗該逆退紮距城六七里地方見在思南朗圖等處雖已廓清而首惡未除河西賊巢未破亟宜實力勦辦著勞崇光張亮基檄令沈宏富統率所部相機進勦沈宏富見在湖南邊界就近添募勇丁卽著認真訓練以期餉不虛糜兵歸實用勞崇光張亮基惟當督飭該署提督迅將松銅思南各匪節節蕩剪除巨憝次第肅清疆圉松桃等屬匪勢甚熾該處均係湖南毗境黔省兵力本單亟須鄰軍援應著憚世臨督飭派出官軍會合黔軍協力勦洗兩面夾攻以收聚殲之效該逆前由寨瓦旁竄秀山連界之濫橋九峰寺一帶雖經秀山兵練擊

退難保不再圖窺伺著駱秉章檄飭該縣防軍嚴密堵禦力保完
善毋令匪蹤闌入總兵周洪印一軍前在三崗會剿因糧乏撤退
見在荔波獨山一帶逆餒鴟張意圖大舉粵黔兩軍防剿不敷分
布若非添撥勁旅恐該逆益肆蔓延著憚世臨仍飭周洪印統率
所部兼程馳往荔波獨山等處會同粵黔各軍進剿以厚兵力勞
崇光等所稱前請飭撥各省協餉均以空文見覆黔事尙非必不可
爲惟餉項奇絀若再毫無接濟飢軍一經譁潰不獨本省不可
收拾卽川楚毗境必致駸駸蔓及請飭川楚二省按月協濟銀一
二萬兩卽可稍蘇涸轍等語亦係實在情形著駱秉章憚世臨無
論如何爲難竭力籌措每月各協解黔餉一二萬兩以濟要需前
因甘省軍情緊要諭令駱秉章於川楚得力兵勇挑選數千籌備
軍裝口糧揀派知兵大員統帶前赴都興阿軍營聽候調遣見在

甘肅回匪猖獗固原復陷新疆各城亦均多蠢動亟需厚集兵力以資剿辦而遠調之兵不習地利無可籌撥著駱秉章懷遵前旨迅速撥往毋再遲延將此由六百里各諭令知之○諭常清奏葉爾羌失陷烏魯木齊城圍未解英吉沙爾等城防守情形保恒奏各處回匪變亂烏城久困並因病懇請開缺各摺覽奏不勝憤懣葉爾羌爲南疆總匯之區茲據奏稱六月二十三日漢回變亂城池被陷是南路匪勢極爲猖獗英吉沙爾喀什噶爾二城均有武弁勾通漢回謀叛雖經官軍剿殺數百名餘匪逃竄而葉爾羌既經失守該二城僻在西隅勢成孤立亟應加意嚴防著奎英托克托布就存城兵力慎固封守毋稍疏虞常清一面酌撥兵勇繞道援應一面派兵疏通冰嶺之路由阿克蘇一帶節節進剿迅復葉爾羌等城均著妥速籌辦烏魯木齊滿城被圍日久糧食垂盡勢

甚岌岌著常清督飭圖庫爾等軍迅速前進將庫爾喀喇烏蘇賊
匪先行剿淨進援烏城平瑞當固守城池一面催提援兵合力夾
擊以解城圍見在南北兩路同時擾亂伊犁防守事宜尤宜嚴密
布置明結此時計已行抵伊犁卽著常清商同籌畫一切辦理就
緒後明緒懷遵前旨帶兵出境酌量南北緩急剋期進發仍分別
良莠剿撫兼施以期肅清疆圉常清請調之內地兵雖屢經有旨
催調但此時亦緩不濟急昨據廣鳳等奏已請到科布多蒙兵一
千餘名派郡王凌扎棟魯布等帶赴古城著廣鳳奎昌催令星速
前進如有可續調之兵再行酌量派撥並著麟興車林敦多布迅
將喀爾喀蒙兵儘數調撥飛催由科布多一帶取道前赴烏魯木
齊聽候調遣古城近接烏魯木齊保恒惟當督率兵勇認真防剿
並設法籌解烏城糧食以濟眉急巴里坤派到之官兵二百餘員

名著保恒飛催起程應援烏城毋稍延緩保恒因病懇請開缺此時古城防勦緊要豈得置身事外著賞假一月調理毋庸開缺仍著將城守事宜竭力籌辦以副委任將此由六百里各諭令知之○予貴州殉難知縣方時乾祭葬世職○兩江總督曾國藩奏遵繪安徽全省地圖並長江圖說進呈報聞○丙午福建巡撫徐宗幹奏汀州官軍截勦江西瑞金竄匪獲勝得旨瑞金竄匪雖已擊退仍應嚴防回竄竄近廣昌之賊股卽飭張運蘭馳往確探會合江西官軍迎剿以期一鼓殲除林文察已抵泉州卽派令酌帶隊伍確探賊蹤所在痛加勦洗毋令闖入閩境○四川總督駱秉章奏蔡啟二逆合竄溪南見籌防勦事宜得旨昨據劉蓉奏蔡啟二逆被官軍擊退後餘黨狂竄階州該撫已飭蕭慶高等越境窮追與駱秉章此奏大略相同著卽飛催唐友耕各軍偵探迎剿並會

合肅慶高等軍夾擊務期翦滅淨盡毋令闖入川境○以賀壽慈

爲左副都御史

由大理寺卿遷

○予安徽殉難署知州潘忠駿祭葬世職

○戊申諭議政王軍機大臣等穆圖善奏馬步各營分期起程並

仍帶金順馬隊援甘一摺蔡啟二逆由略陽突圍經豳口郭家壩

竄至白馬關餘賊已出陝疆穆圖善以甘省軍情緊要仍飭金順

馬隊於八月二十七日起程赴甘計此時已過耀州辦理甚爲妥

協著穆圖善卽飭金順趨程前進協同剿洗以厚兵力前諭官文

將溫德勒克西等及蘇倫保馬隊派往甘肅交穆圖善統帶藍斯

明等步隊如楚省軍情稍鬆亦令調撥赴甘著官文懷遵前旨趕

緊籌撥催令飛速起程毋得奏畱致誤事機漢南一帶見在雖無

賊蹤難保不復圖回竄如將來陝西有必需馬隊之處俟溫德勒

克西等各起馬隊抵秦時著劉蓉酌度情形就近暫畱若干藉資

協助如陝省無須此項馬隊卽著劉蓉於溫德勒克西等過境時
催令星速遄行迅赴穆圖善軍營聽候調遣前據駱秉章奏逆匪
竄至柳林鋪勢將窺伺通江南江邊隘或卽循黃官嶺以奔廣元
茲據穆圖善奏賊已由文縣竄至龍安府境是該逆業由西路竄
入川疆著駱秉章飛催唐友耕周達武等軍確探賊蹤星馳截剿
並著劉蓉檄令蕭慶高何勝必兩軍跟蹤緊躡兩面夾攻以收聚
殲之效陝省此時雖已無賊各路防堵仍不可稍涉大意善後事
宜亦當次第經理均著劉蓉妥爲籌辦將此由六百里各諭令知
之○廣江西金谿萍鄉安福三縣學額各三名玉山萬載各二名
○己酉諭議政王軍機大臣等玉通奏西甯回眾投誠以後屢差
文武委員暨身赴各處寺院莊村撫恤難民解散鄉勇一摺並補
奏上年十月兵勇節次獲勝餘匪畏威投誠各情形一摺覽奏均

悉玉通帶員馳赴北川果莽果隆吹布藏等寺商同章嘉呼圖克圖等傳集漢土番回勇目曉以安分務農無不樂於息事惟因回性反覆不得不防見將團勇散去一半尙餘一半保守寺院暨各村莊尙非恃眾尋釁自應俯如所請其塔爾寺練勇經玉通等疊次勸諭已有息事之機著玉通卽飭知府達昌等認真開導以期永息爭端不得畏難苟安冀圖目前便利恩麟護理督篆各路均應兼顧乃不察被害情形一味主撫於西甯軍務漫不關心前派道員雅爾佳納在湟安撫該道見事難爲先行回省恩麟何以並不據實參奏馬乚氏勸諭回眾尙能聽從何以復行調回省垣以致回民勾結殺掠相尋實堪痛恨嗣後務須隨時兼顧若再視同膜外貽誤地方必將恩麟從重治罪決不寬貸玉通另片奏紳民請畱成瑞在甯開導等語成瑞前次獲咎甚重旣據該處紳民合

詞額懇卽著恩麟飭令該革員前赴西甯開導華寺臨洮兩教回
匪如其辦理無效仍著玉通等將其解京治罪不得藉詞延緩將
此由六百里並諭知玉通傳諭恩麟知之○以江蘇官軍克復蘇
州暨浙江平湖等城出力各員加銜升敘開復有差○予江蘇陣
亡知縣周守典祭葬世職○庚戌諭議政王軍機大臣等都興阿
奏張家川回匪旁竄平慶戒嚴並請飭陝撫撥解糧餉軍火等件
各摺片張家川逆巢經雷正綰攻克後敗回三路竄入鎮原縣境
已鈔過平涼漸近慶陽其意蓋欲糾合全股乘平涼後路空虛
陽防兵單薄北趨援甯非有勁兵截擊不足以制賊死命前據雷
正綰奏進攻蓮花城因銳意深入山險人馬礙難旋布猝被矛傷
以致失挫當經諭令都興阿酌度機宜先與雷正綰等軍聲勢聯
絡再行節節進剿見在同匪已經旁竄雷正綰傷口近日是否平

復著卽整頓隊伍與陶茂林會督諸軍北趨平固會合慶陽一帶
防兵跟蹤兜剿迅圖掃蕩毋令與甯靈之賊串通一氣並著穆圖
善懷遵疊次諭旨迅統所部星馳前進會同都興阿雷正綰安籌
攻剿曹克忠一軍著劉蓉催令剋期入甘迎頭截擊務與雷正綰
等合力進攻迅殲醜類陶茂林等軍軍火等項疊經諭令劉蓉飭
令陝西糧臺按月供支見在陶茂林軍火缺乏糧餉又無接濟將
士飢寒交迫譁潰堪虞陳天佑西蒙克西克等軍雖經都興阿爲
之騰那竟有不支之勢劉蓉於疊次催解要需竟敢視同膜外屢
催罔應儻因糧餉軍火不繼貽誤大局該撫其能當此重咎耶著
劉蓉懷遵疊次諭旨迅撥鉅款並所需軍火等件一併星速委解
分赴陶茂林陳天佑西蒙克西克等行營以濟急需並著源源接
濟毋令匱乏不准再事推諉都興阿另片奏遵飭訥欽回旗另派

翁同書接統其眾卽著照所擬責令翁同書將訥欽部眾力加整頓認真防剿將此由六百里各諭令知之○諭傳諭陝西按察使張集馨張集馨奏遵報出省日期一摺前因固原復陷回匪叛服無常曾諭令張集馨馳抵甘省後相機籌辦茲據張集馨奏稱陝逆孫義寶赫明堂等叛踞州城固原見已梗塞擬先到涇州一帶察看情形等語著於馳抵涇州後將見在回匪情形據實詳細具奏如該匪犬羊性成負固不服萬無勉強招撫之理卽著張集馨徑赴蘭州會同恩麟於一切防剿事宜妥籌辦理仍一面將抵蘭日期迅速具奏○命四川川北鎮總官兵鶴齡赴署陝甘總督都興阿軍營聽候差委○予四川陣亡縣丞王鎮堃祭葬世職建祠○辛亥諭議政王軍機大臣等楊岳斌沈葆楨奏皖南各軍分路堵剿疊勝並江省東路布置情形一摺另片奏皖防各營續報截

般竄賊等語湖州廣德

賊闌入皖南經劉松山收降五千

餘人復經唐義訓易開俊痛剿於山陽阮其輝愈挫逆眾敗伏涓安山內另股逆匪亦經易開俊等督軍邀截斬殺解散甚眾卽著楊岳斌督飭皖軍乘此聲威會合浙師聯絡兜擊盡殲醜類至收降太眾宜防反側其隨營效力之賊目王起文等尤應加意防範毋令患生肘腋並著楊岳斌飭令皖南將弁妥籌辦理毋稍大意此次紛竄各股賊未能越皖入江具見皖軍遏截之效見在鮑超已由建昌拔營東行以顧廣饒兩路楊岳斌等復派孫昌國督帶水師嚴扼廣信等處河面東路防守已固仍著楊岳斌沈葆楨督率任事文武審慎守禦百密毋致一疏是爲至要正在寄諭聞據毛鴻賓馳奏逆匪由江西竄入粵界分隊進逼南雄州城雖經唐啟蔭督兵攔截獲勝而賊勢蔓延南雄迤東之始興翁源迤西之

仁化樂昌皆有賊蹤廣東爲賊匪注意之區而惠潮嘉三屬尤首當其衝毛鴻賓見已飭令唐啟蔭等募勇增兵防堵北江一路方耀等軍防堵東江一路又另委守備黃添元等募選練勇以備調遣並爲省城巡防之需所籌尙屬周密卽著毛鴻賓郭嵩燾督飭在事員弁實力扼剿迎頭截擊毋令賊蹤紛竄擾及完善之區前據楊岳斌等奏賊匪被剿竄粵江西各軍不能越境追剿當經諭令粵東地方緊要該督等務當派兵追擊毋任滋蔓難圖見在南韶一帶賊勢甚熾新募之兵恐不足以制賊死命著楊岳斌沈葆楨懍遵前旨迅飭甯贛等處防兵剋日拔隊越境會剿不得畛域攸分貽誤大局其毛鴻賓咨商鮑超調派之王衍慶五營並著楊岳斌等催令迅速起程赴粵以厚兵力毋許稍有遲誤將此由六百里各諭令知之○以張兆棟爲四川按察使

記名按察使

○王子謙

議政王軍機大臣等左宗棠奏截剿竄賊獲勝浙境肅清各營出境追剿一摺逆匪由遂安昏口一路闌入開化總兵王開琳副將劉明珍等合兵追擊賊不能支由華埠竄江山玉山疾趨廣豐沿途殲斃甚眾受降者亦近萬人洪幼逆幾被擒獲復爲粵逆拌死潰圍挾之而走見由廣豐竄入鉛山縣境一向紫溪車盤一繞鉛城向湖坊一路逸去死黨尙有數千見在劉典一軍已抵貴溪黃少春劉明珍兩軍已抵廣信河口王開琳等亦率眾跟追著左宗棠楊岳斌沈葆楨督飭諸軍前截後追毋畱遺孽左宗棠自入浙以來克復城隘數十處肅清全境厥功甚偉本欲卽加懋賞恐該督以洪幼逆未滅必將固辭一俟餘逆淨盡卽降恩旨浙省軍務已竣地方應辦一切善後事宜該督當飭司道等次第辦理以期奠安閭閻另片奏洪幼逆入浙則派兵跟追均屬正辦所稱此後

公事仍與曾國藩和衷商辦不敢稍存意見尤得大臣之體深堪嘉尙朝廷所望於該督者至大且遠該督其益加勉勵爲一代名臣以副厚望鮑超由建昌拔營顧廣饒兩路楊岳斌等復派孫昌國督帶水師嚴扼廣信等處著卽懷遵昨奉諭旨督軍會浙軍迎剿以期一鼓殲除收降之眾過多仍飭各軍妥爲駕馭如遣散其眾尤須審辦慎理以防後患將此由六百里各諭令知之○諭張之萬等奏東路竄匪經張曜追擊出境西路一股被剿南竄復偏商城請飭張曜回軍扼守一摺遵逆等股在黃安麻城境內分路盤踞經陳國瑞等揮軍追殺賊竄黃安大山依險負隅該處溝深路窄馬隊難於施展豫省步軍又多疲乏亟須勁旅協剿以厚兵力著官文嚴檄成大吉等軍會同僧格林沁所部及豫省官軍協力兜剿四面圍攻以期聚而殲旃並著張之萬毛昶熙激勵將弁

實力進攻如該逆逸出山險卽著僧格林沁督飭馬隊官軍痛加勦洗迅殄逆氛黃麻之賊復竄至石香爐黃土岡等處逼近西界嶺圖窺商城張之萬擬調張曜回軍商城扼守張曜見在扼紮六安之流波磴等處應否調回商城以固豫省邊防之處著僧格林沁體察情形相機辦理僞端王及馬泳和等股仍踞英霍一帶僞扶王等股由六安之流波磴折竄漫水河地方是皖省邊境匪勢尙形滋蔓著喬松年督飭在防各軍節節掃蕩將各股匪迅速殄除肅清邊圉正在寄諭間據官文奏斬羅賊匪仍復依山固踞光羅髮捻繞道回竄黃安擾及麻城黃岡地界經水陸官軍追擊悉趨蘄水蘄州等語與張之萬所奏情形不同是否該逆由黃安分股竄逸著官文張之萬探明賊蹤分投勦洗成大吉等後路運道已爲蘄水之賊圍逼梗阻官文當督飭李成謀周鳳山等軍星速

解圍疏通成大吉等營糧路一面繞路會攻斬水羅田英山毗境賊匪負隅如故著官文飛飭劉連捷朱洪章等軍由宿松太湖一路節節迎勦力顧蘄州等處要隘僧格林沁之軍如已到麻城卽著相機會勦以資厚集前諭官文將溫德勒克西等及蘇倫保馬隊派往甘肅交穆圖善統帶著官文懷遵前旨催令趕緊起程儻再不知緩急觀望遷延卽著從嚴參辦至藍斯明步隊能否調撥赴甘之處並著官文妥爲籌畫迅速辦理將此由六百里各諭令知之○署陝西提督雷正綰奏陝回竄陷固原見籌勦辦得旨著恩麟督飭楊炳銓飭屬一體嚴防竄越毋得再有疏虞其穆隆阿成瑞退駐平涼情形難保非聞警先遁著查明據實具奏恩麟楊炳銓疏於籌布均交部議處○以延煦爲內閣學士由詹事遷○予浙江殉難署縣丞張名第祭葬世職○癸丑嚴飭各省迅解京餉○

撥江海關海兩關銀各五萬兩濟唐茂林軍餉○甲寅諭議政王
軍機大臣等喬松年奏英霍逆匪被剿西竄見籌剿辦情形一摺
逆匪竄聚英霍一帶圍攻蔣凝學之軍並分擾至潛山邊境經蔣
凝學督軍苦戰屢挫兇鋒復經英翰郭寶昌儘力追剿該匪遂退
竄新羅一帶蔣凝學乘勝尾追斬擒甚眾英霍已無賊蹤剿辦甚
屬出力蔣凝學等均著先行存記俟軍務大定由喬松年奏請給
予獎賜見在逆蹤雖已西趨難保不乘閒回竄蔣凝學扼守英山
極爲得力未可遽令赴鄂其英霍交界卽著飭令英翰扼要駐紮
妥籌援應六安及流波疇一帶仍著責令張得勝認真防守與英
翰等聯絡聲勢嚴密戒備曾國藩前派之劉連捷朱洪章朱南桂
等軍及續派之李榕王可陞何紹彩等軍計已到皖此時英霍已
無賊蹤自應越境進剿卽著曾國藩喬松年飭令拔隊赴鄂會合

楚師兩面夾擊盡殄賊氛曾國藩見赴江甯距英霍一帶較遠若
派出諸軍悉由曾國藩調度軍情旦夕變遷千里請戰深恐緩不
濟急所有劉連捷等軍已抵皖境以後一切進剿機宜即可由喬
松年斟酌調派以期毋誤事機斬羅等處賊氛儘集官文當懷遵
前旨督飭在事將弁實力扼剿並飛調劉連捷等軍追擊僧格林
沁之軍如已到麻城並著相機會剿以資厚集將此由六百里各
諭令知之○乙卯諭議政王軍機大臣等有人奏吉林三廳地方
有賭匪盜匪山匪各名目逞兇擅殺戕斃多命將軍景綸聲名狼
藉粉飾欺蒙日縱協領常明富全明祿等擅權納賄表裏爲奸各
等語吉林爲根本重地似此賊匪不靖劣員貪污虧國帑而害民
生所關非細著阜保接奉此旨卽行馳赴吉林地方將賊匪肆劫
情形及該將軍景綸並協領常明等各款劣蹟秉公嚴密訪查據

寶參奏毋稍徇隱又有人奏吉林宜專設理刑大員及煙木等稅銀宜查明歸公各摺片是否可行應如何妥定章程之處著一併查議具奏摺二件片一件均著鈔給閱看將此密諭知之○丙辰諭內閣總管內務府大臣奏統籌庫款全局請飭部妥議章程一摺內務府廣儲司銀庫備辦內廷一切供支並紫禁城直班官兵口糧等項均係必不可少之款原係粵海關按年解交公用銀三十萬兩以供急用乃該關歷年積欠甚鉅曾經該衙門疊次奏請將該監督及該省督撫等參處並兩次奏借戶部銀三十萬兩粵省督撫及粵海關監督累次奏請改撥亦經該部衙門議駁而議駁之後仍未見踊躍報解內廷正供幾屬虛懸實屬不成事體著戶部將粵海關指撥一切款項通盤籌畫務將應解內務府公用銀三十萬兩令該監督按季全數報解迅速妥議章程奏明請旨

遵辦以重要需此項公用銀兩係常年正供並非爲額外工作及服物玩好之用惟物力艱難理財首宜節用嗣後宮內雖尋常工作大不得已者亦著酌量停緩以節糜費其餘一切照例進御服飾器皿等件並著總管內務府大臣等懷遵疊次諭旨覈實備辦力求撙節以示朝廷崇儉黜奢之至意○諭議政王軍機大臣等駱秉章奏攻剿滇黔股匪獲勝一摺伍逆股匪麇聚秀山龍甕場經曾志友等進剿該逆敗竄黔境復糾白號股匪由麻兒司擾陳家陂等處大股竄至濫橋官軍分路痛殲復敗由黔境孟溪逃入銅仁屬之三元壘該處距川雖已較遠難保不復圖回竄著駱秉章檄令曾志友等軍在秀山西南兩路嚴密防守賊匪見仍逃回銅仁著勞崇光張亮基督飭官軍痛加剿洗迅殄逆氛前諭憚世臨仍飭周洪印馳往荔波獨山等處剿匪茲據駱秉章奏曾志友

帶兵出境會同周洪印直抵孟溪是該總兵所部尙駐銅仁一帶
見在曾否起程前赴荔波獨山著憚世臨酌度情形相機辦理憚
世臨惟當督飭防軍會同黔粵各軍將黔省之匪迅加殄滅庶湖
南邊境得以漸就敕平貴州正安桐梓之匪竄至涪州之大河壩
經成耀星等越境追剿餘匪由蓋了場遠竄著駱秉章勞崇光張
亮基激勵派出各軍協力掃蕩兩面夾攻務將此股賊匪殲除淨
盡以期漸就肅清滇匪勾結苗匪由敘永之大壩竄至建武興文
瀘衛等處經胡日祥等帶兵追擊該逆敗回大壩許蔭棠復率所
部緊蹙躡平大壩賊壘追賊出境貴州仁懷號匪又竄至敘永廳
古蘭地方駱秉章見派許蔭棠約會劉嶽昭所部前往截剿卽著
飭令相機布置認真剿辦林鴻年身任巡撫雲南剿匪事宜責無
旁貸應如何將此股滇匪速爲撲滅之處著與駱秉章妥爲商辦

八月二十六日密諭林鴻年接奉後並著與駱秉章勞崇光悉心酌度通籌全局迅赴昭通妥爲辦理啟蔡二逆渡白水江西竄陟文意將出畢口以窺川西著駱秉章飛檄周達武等軍移防昭化平武江油一帶與陝軍前截後追迅殲醜類前諭駱秉章撥兵數千赴甘助剿著卽迅速調派毋誤事機將此由六百里各諭令知之○諭前因新疆軍務喫緊疊經諭令文祥馳赴軍營督辦並揀員署理哈密辦事大臣以便文祥交卸起程茲據保恒奏稱哈密無可派署之員新任吐番領隊大臣扎克當阿庫爾喀喇烏蘇領隊大臣惠慶俱已行抵巴里坤請飭扎克當阿就近署理哈密辦事大臣印務等語新疆回氛甚熾烏垣等處防剿均形喫緊見在科布多調派蒙古援兵已於八月初十日起程不日卽到古城境內烏里雅蘇台所派蒙古官兵計 剋期赴援亟須大員督率

操練以利攻勦扎克當阿已行抵巴里坤著卽馳赴哈密就近署理哈密辦事大臣印務並由保恒知照文祥俟扎克當阿行抵哈密卽行交卸馳赴軍營督勦毋稍延緩保恒前因衰病奏請開缺業經賞假一月調理並責令將城守事宜認真籌辦該大臣旣因骹疾不能乘騎自可毋庸督隊著卽飛咨惠慶迅由巴里坤起程馳赴古城統帶蒙古援兵一切防勦事宜仍著保恒與惠慶會籌妥辦毋得稍形推諉貽誤事機一切見辦情形卽由保恒咨照常清平瑞文祥知悉將此由六百里各諭令知之○予四川陣亡遊擊胡得勝祭葬世職○丁巳諭內閣不入八分輔國公承志著襲封鄭親王爵入八分鎮國公載敦著襲封怡親王爵岳靈前經賞給不入八分輔國公卽著作爲承襲承志所遺世職載泰前經賞給不入八分輔國公此次載敦所遺之爵例應降襲入八分輔國

公世襲罔替載泰著加恩賞給入八分輔國公卽著作爲承襲載
敦所遺之爵均准世襲罔替○諭前因載垣狂悖恣肆跋扈不臣
革除王爵其怡賢親王允祥雍正年間所奉 特賞手勅業由宗
人府恭繳嗣因追溯前勅時深睠念於本年七月間特沛恩綸將
怡親王世襲王爵賞還本日宗人府將應襲之人帶領引見已降
旨令載敦承襲所有雍正元年原奉 手勅卽著載敦祇領敬謹
尊藏用昭世守其勤慎恪恭勿墮先人舊德以期裕後光前長承
恩眷此旨並著內閣繕錄一通交宗人府頒給載敦祇領○諭議
政王軍機大臣等文煜奏准都興阿咨稱穆圖善十營起程入甘
請將軍食餉項寬爲籌備惟慶陽糧臺各省協餉報解寥寥僅收
過山東山西河南解到銀二十四萬兩以供四五十營餉糈軍火
奇窘萬分見在存款一空卽供支都興阿雷正綰及慶環各軍已

覺顧此誤彼穆圖善餉精實難兼顧請飭該將軍將原有糧臺隨帶入甘其原撥該營餉銀卽徑解該將軍糧臺交納並請飭山東山西河南四川各督撫迅解慶陽協餉等語所奏自係實在情形著該將軍卽將原有糧臺隨帶入甘一切收支散放卽由該將軍糧臺經理以專責成並著沈桂芬劉蓉懷遵前旨按月如數撥解務期源源接濟以資飽騰至慶陽糧臺入不敷出爲數甚鉅見在節屆深秋各軍衣食無資豈能荷戈力戰著駱秉章張之萬閻敬銘沈桂芬迅於前撥慶陽糧臺協餉之三十萬兩內無論何款移緩就急各先籌解銀十萬兩沈桂芬並飭河東道將甲子綱鹽課銀兩趕緊分批解赴慶陽以濟急需正在寄諭聞據都興阿奏西甯回匪猖獗府城被圍固原復陷請將辦撫不實之員嚴辦及飭江蘇等省將調撥赴甘各軍餉銀按月運解各摺片西甯回匪前

據玉通奏業已投誠並親赴各處寺院村莊解散鄉勇何以此次青海盟長王公及塔爾寺阿家呼圖克圖復紛紛向都興阿軍營呈稱同匪圍困西甯府城懇請發兵拯救可見回逆犬羊成性反覆無常玉通所奏投誠各情全不足恃著玉通將回逆何以復叛情形迅速馳奏見在該逆勾通巴燕戎格廳撤回等肆意焚搶猖獗已極而都興阿雷止綰分剿靈甯蓮花城等處之賊兵力難分非得知兵大員統帶勁旅馳往勢難力挫兇鋒前有旨令駱秉章撥兵援甘並因官文奏調顏朝斌諭令駱秉章飭令該員迅赴鄂省此時西甯軍務緊要自應移緩就急迅速赴援著駱秉章於援甘兵勇外另撥勁旅於顏朝斌江忠濬二員內酌派一員統帶馳赴西甯力籌剿辦並著都興阿劉蓉會商檄令曹克忠卽統所部前往西甯協剿如該總兵尙須會剿蓮花城之賊一時未能前往

卽由都興阿札飭蒙古各王旗同心禦侮以資保衛玉通責無旁
貸著就見有兵力布置城守事宜妥籌防剿毋稍疏虞至甘肅餉
源支絀萬分駱秉章先後所派援甘兵勇甘省萬難供支著該督
將調撥赴甘各軍先行發給數月餉銀飭令迅速赴甘仍照舊按
月供支源源接濟固原復陷情形前據雷正綰恩麟先後馳奏與
都興阿此奏略同楊炳鏗以辦理撫局之員前稱固原回匪投誠
情詞已多愴恍此次藉口張家川喫緊與雷正綰面商進兵還出
危城脫身遠遁情節顯然穆隆阿成瑞本在固城所稱良回泣請
出城並送至平涼各節種種支離難保非聞警先遁借詞掩飾張
集馨見抵涇州卽著將此案主撫不善及失事情形徹底根究據
實參辦毋稍徇隱將此由六百里諭知都興阿穆圖善駱秉章張
之萬閻敬銘沈桂芬劉蓉玉通文煜並傳諭張集馨知之○戊午

諭議政王軍機大臣等恩麟奏陝匪竄陷階州請飭川陝官兵援救並察看鹽固等處陝回情形及請撥火箭各摺片據稱蔡逆一股由陝西略陽直撲甘肅徽成兩縣經兵團堵遏退至略陽復犯階州致將州城攻陷見飭林之望馳往剿辦而兵力單薄請飭催各路援兵等語前據劉蓉奏敗匪紛竄階州已派蕭慶高等追擊並據穆圖善奏賊由文縣竄至四川龍安府境當經諭令駱秉章飛催唐友耕等軍探蹤迎剿劉蓉飭蕭慶高何勝必兩軍跟追見在賊已攻陷階州逆氛正熾駱秉章迅卽檄令唐友耕周達武等由階州一路前進迎頭截擊力挫兇鋒劉蓉所派追賊之蕭慶高等軍見在行抵何處何以並未追及致賊勢如此猖獗著劉蓉嚴飭該員等迅速進兵力圖掃蕩如再不能得力卽將該員等嚴參治罪甘肅彫敝之區非賊之所注意其意仍欲乘隙圖擾川陝階

州境地與川陝兩省毗連川陝兵勇果能越境剿賊卽所以自固疆圉路秉章必能不分畛域協力助剿此股賊匪本由陝省敗竄入甘劉蓉何得以驅賊出境遂爲了事也至恩麟請令曹克忠徑赴階州穆圖善取道入甘先除髮逆再剿回匪各節昨因都興阿奏西甯被圍已令曹克忠赴該處剿賊而甯靈一帶軍務緊要疊次催令穆圖善赴都興阿軍營此時均難改調恩麟惟當就見有兵力檄令林之望迅圖恢復會合川陝援軍併力兜擊一切軍情隨時咨商都興阿妥辦昨諭路秉章派撥勁兵酌委顏朝斌等帶赴西甯此軍如能取道階州節節進剿更爲得力此外如有可撥兵勇添派入甘之處均著路秉章酌度辦理恩麟所陳鹽固等處陝回情形前已派張集馨赴甘查辦該員見赴涇州自必能遵旨相機辦理其請撥火箭數千赴陶茂林軍營一層火器營火箭疊

經各路軍營調撥所存無多不敷撥解山西省前有由京派往製造火器之員此種火器該省必有存畱卽著恩麟咨明山西省撥用可也將此由六百里諭知都興阿駱秉章劉蓉並傳諭恩麟知之○己未諭議政王軍機大臣等沈葆楨奏東路主客各軍剿賊獲勝廣信地面肅清暨洪幼逆等遠遁各摺片玉山之賊經官軍擊敗後竄繞江山界以出廣豐顧雲彩等於施村一路追剿沿途砍殺賊屍枕藉張岳齡等復由杉溪一帶擒斬賊酋並老賊無算王德榜等由浙埽蕩入江擊賊於七都球等處收降二萬餘人陣斬洪元珍李金信等花旗羣賊擁洪幼逆而遁王開琳追至鉛山界上斃賊多名黃少春王德榜復追賊於陳坊湖坊等處沿途斬馘不可勝計此股賊匪踉蹌逃遁匪勢寢衰著左宗棠楊岳斌沈葆楨等督飭江浙各軍盡力窮追毋令死灰再行復然洪幼逆同

李遠繼均薙髮扮作難民率餘黨分股竄光澤瀘溪一帶晝不落
村莊夜用香火照行不循蹊徑避兵而行雖其氣衰竭而行蹤殊
形詭秘設亡命窮奔與前股之賊會合則其燄又將復熾且殘匪
尙有數千非零星落荒之賊無足重輕者可比仍著檄令各軍奮
力窮追務將洪李各逆剋日擒獲並飛飭沿路經過地方認明蹤
迹一律訪拏以膺厚賞汪丁各逆見踞瑞金攻破民寨而分擾興
國信豐會昌龍南崇義各界之賊分股回竄韓進春等馳往剿拏
復分犯興國之上下謝雲都之仙露觀賊氛鬱集勢殊死鬪必須
迅圖掃蕩方免蔓延江省東路旣已肅清正可專意西指以期厚
集鮑超擬由甯都馳赴瑞金著左宗棠楊岳斌等督飭全軍合力
兜擊務將幼逆一股杜絕竄路各路餘匪殄滅淨盡並著徐宗幹
毛鴻賓郭嵩燾嚴飭防軍會同追兵合力夾剿毋令紛竄皖南防

務已鬆著曾國藩酌調數營會合江浙等軍將竄賊悉數誅鋤以
竟全功前由江入粵之賊進逼南雄州城分竄翁源樂昌等處近
日剿辦情形若何著毛鴻賓郭嵩燾隨時具奏以慰馳厯將此由
六百里各諭令知之○諭穆圖善奏援甘之師前隊已抵中部督
率後路繼進見飭前途籌備行糧並遣撤傷病官兵一摺據稱該
將軍派兵起程先期咨會劉蓉飛飭北山延安一帶州縣籌備二
日行糧並委員前往催辦該將軍行抵三原接據延安府稟稱延
安所屬各縣地瘠民貧所有麴麴等項難以籌辦等情查延安地
方苦寒雖係實情然一二日之糧爲數無多總可設法辦理見已
飭令該府等趕緊籌備等語此項兵勇前隊已抵中部若令停兵
待餉譁潰堪虞著劉蓉速飭該府等無論何款趕緊設法籌辦並
飭鄰近州縣幫同趕辦籌備二日行糧俾得迅速前進以利軍行

毋得稍事延玩致滋貽誤該兵勇行抵甘境所需行糧爲數甚鉅
著都興阿雷正綰迅飭沿途鄰近各州縣趕緊設法採辦所需價
銀俟山陝解到穆圖善軍營餉項卽照原價劃扣以清款項所有
打仗受傷之馬隊官兵卽著穆圖善妥爲遣撤將此由五百里各
諭令知之○以潘祖蔭爲左副都御史由光祿寺卿遷○以江西署南安
府知府黎兆棠母馮氏嫡士守城賞二品封典賜扁額○予廣東
陣亡從九品馬振鸞祭葬世職○庚申詔修曲阜縣 聖廟及各
省學宮○廣江西浮梁縣學額十名瑞金六名○辛酉諭議政王
軍機大臣等左宗棠奏浙軍出境追剿連獲勝仗見籌剿辦情形
一摺此股逆匪由皖浙邊界上竄人數眾多經浙軍節節追剿斬
擒不少入江後復經王開琳等追剿於廣饒鉛山等處其由茶山
竄瀘溪地界者僅一二千人該軍截其尾股見在江南金瀘新城

一帶兵力不少著楊岳斌沈葆楨督飭各軍搜捕以清餘孽洪幼
逆李遠繼等由江閩邊界山徑偷越勢極窮蹙著左宗棠徐宗幹
督飭張運蘭康國器相機截剿毋令闖入閩邊楊岳斌等仍當飭
軍跟追毋稍疏懈前由江入粵之賊竄偏南雄等處著毛鴻賓郭
嵩燾妥籌辦理並將近日情形速行入奏如續有竄入餘匪務卽
督飭兵練迎剿毋任深入爲患浙軍往返奔馳傷病不少著照左
宗棠所請暫畱弋陽河口稍爲養息各軍追奔逐北千有餘里備
極艱劬著准其彙入克復湖州安吉案內一併保獎洪幼逆踴躍
逃走終必就擒左宗棠惟當督飭閩浙諸軍合力夾擊毋任漏網
以竟全功所請交部議處著加恩寬免前據御史洪昌燕奏浙江
海塘潰決請速籌款修理當經降旨交戶部妥速議奏昨經戶部
議准將浙海關等稅酌撥動用著左宗棠遵照部議章程履勘興

修及此冬令水涸潮汐不旺易於告成東南民命攸關漕運大局所繫諒該督必能仰體朝廷惠愛黎元之意撙節帑項安速籌辦其如何辦理情形並著趕緊具奏以慰馳廬將此由六百里各諭令知之○左宗棠奏前據總兵劉明燈搜獲忠逆李秀城之子李士貴據供湖北江夏人咸豐二年湖北省城初次失陷時被李秀城擄去爲子改名李士貴咸豐十一年加封偽二殿下率黨萬餘歷隨李秀城竄擾安徽湖北江西浙江江蘇各省兩陷杭城本年三月間由丹陽竄至廣德復到湖州與黃汶金合股六月間幼逆洪福瑱自金陵缺口衝出沿途除擒斬逃散外至廣德實有五百餘人內有僞養王吉馨元僞揚王李名城卽李秀城之胞弟並李秀城之母及李秀城親生兩歲之子該逆由湖州廣德甯國竄至歙南被擒時洪逆及僞祐王李遠繼僞偕王譚體元僞干王洪仁

开偽揚王李名城及李秀城母子已先渡河以後事均不知悉其
偽首王范汝增受傷後實已身死臣因各營搜獲逆目甚多其逃
匿降眾之中潛易姓名希圖倖免者當復不少飭各營嚴密盤詰
暫畱李士貴質認稍緩處決報聞○壬戌諭內閣前因鄭親王端
華革爵應行呈繳鑲藍旗纛旗當經降旨交惠親王執掌茲據宗
人府奏和碩鄭親王爵見經奉旨令承志承襲其鑲藍旗纛旗應
否移交等語所有鑲藍旗護軍營纛旗仍著移交承志執掌○諭
議政王軍機大臣等雷正綰奏擊退撲營賊匪進逼蓮花城賊巢
涇州防軍截剿固原竄賊獲勝及固原撫局復變鈔錄曉諭良回
告示呈覽各摺片並回於八月十八九二十等日分遣悍黨攻撲
官軍營盤陶茂林堅壁不動用槍礮連環轟擊俟該逆力懈撤圍
跟蹤追殺斃賊十餘雷正綰復於二十七八等日力疾周視各營

嚴陣以待候賊匪將近鼓譟追呼該逆自相驚潰斃賊甚眾將士
膽氣愈壯該提督遂商同陶茂林每日更番疊戰滾營進紮逼近
蓮花城賊巢其由固原圖竄涇州之賊亦經畱防各營剿敗餘匪
旁竄鎮原一帶剿辦甚爲得手卽著雷正綰督飭陶茂林等奮力
進攻務將蓮花城賊巢迅速攻拔毋稍鬆勁其固原旁竄之賊仍
嚴飭劉正高等嚴密堵剿毋任狂竄雷正綰傷病漸愈仍著加意
調攝以慰廑念前因都興阿奏西甯被圍已諭令曾克忠速赴該
處剿賊勢難改調儻西甯賊勢較鬆雷正綰軍營實在不敷分布
曹克忠一軍卽可飭赴雷正綰軍營助剿著都興阿穆圖善雷正
綰斟酌情形相機辦理固原回目張保瀧等前已獻城就撫朝廷
寬其一綫之路准予自新派令張集馨馳往辦理並諭令分別良
莠勦撫兼施原非專主撫議概令投誠見在固原復陷自應實力

勦辦以儆兇頑該提督奏稱西南各回尙未大受懲創該回懷奸
挾詐非痛加勦洗恐難革面洗心蓮花城張家川之匪最爲狡悍
必須悉數殲除其乞撫良回但屬可矜自應分別辦理並鈔錄安
撫良回告示原底呈覽所奏甚合機宜卽著會同都興阿妥爲籌
辦毋得稍涉寬縱余福象一員前據劉蓉奏稱該員情願赴甘助
勦當經降旨准其開缺馳往穆圖善軍營隨同勦賊雷正綰著毋
庸咨調余福象赴營以免紛更將此由六百里各諭令知之○雲
貴總督勞崇光等奏查明已革貴州提督田興恕被參各款及赴
川遲延殺害教民各節並幕友張茂萱謝葆齡劣蹟分別定擬得
旨總理各國事務衙門妥議具奏○癸亥賞普濟堂功德林煮賑
米三百石○甲子諭議政王軍機大臣等官文奏賊嚮聚斂水圍
偏官軍營壘並分股竄擾蘄州麻城等處一摺光羅髮捻晝夜東

趨勢甚剽疾而羅田踞逆亦欲與蘄水一帶踞匪勾合經楊朝林
成大吉等分路攻擊將鴨子畈七區匡家河等處賊巢埽平敗賊
悉竄蘄水蘄州與髮捻合股盤踞該逆乘霧出隊環攻官軍營盤
石清吉等禦賊陣亡富森保衝出重圍成大吉一軍及飛虎七營
仍爲賊匪層層圍襲未能驟出官文已調姜玉順等營赴下游蘄
水巴河會合李成謀相機進剿以解成大吉之圍爲今之計非先
解此圍不能取勝著卽督飭李成謀等迅速進攻力解重圍妥籌
進取官文前調蔣凝學六營赴蘄水駐紮仍請調劉連捷一軍赴
楚兜剿本日適據喬松年奏張曜郭寶昌等軍見駐金家寨等處
東西均可兼顧劉連捷等軍行抵潛山太湖暫爲駐紮聽候曾國
藩調度前諭此軍到皖卽歸喬松年調度見在楚省軍情甚緊著
曾國藩喬松年飛檄劉連捷一軍速赴湖北卽歸官文調遣以厚

兵力僧格林沁見駐商城如匪蹤橫出河南卽著督飭馬步各隊認真剿擊陳國瑞等軍能否分援蕪水合力解圍並著迅速籌辦無分畛域總之此股賊匪人數尙眾逆首陳得才馬融和倪瀧懷吳義汰均在蕪水廣濟一帶非楚皖豫三省通合力作不能殲滅著僧格林沁等會籌辦理以紓朝廷南顧之憂湖北水陸兵力不爲不厚見又調蔣凝學劉連捷等入楚該營均屬勁旅惟在調度得宜方能收指臂之效官文於此股賊匪竄擾未能迅卽撲滅此剿彼竄兵力頗受賊匪牽掣又復屢次敗衄損失名將若不振刷精神力圖剿賊自問當得何罪官文另片奏請畱馬步各隊助剿等語溫德勒克西等馬步各隊見紫宋埠等處經官文飭令覘賊所向力清後路再赴蕪水蕪州官剿著照所請暫行畱楚俟軍務稍鬆兵力稍裕仍令赴甘剿賊不得藉詞逗遛曾國藩前保之布

政使彭毓橘劉連捷按察使吳坤修黃潤昌易良虎陳湜平日於吏治地方能否講求何人足以勝方面之任著再行察看據實具奏以備錄用將此由六百里各諭令知之○予湖北陣亡總兵官石清吉祭葬世職建祠入祀昭忠祠並副將江星南等祭葬世職附祀○乙丑諭議政王軍機大臣等沈葆楨奏克復寧都出力請獎一摺另片奏瑞金克復甯都解圍各情覽奏均悉逆匪偽天將丁汰洋攻陷寧都擾及贛縣之添子壩一帶經韓進春督隊馳至先敗其斷後之賊埽除北鄉城館督軍攻西門小西門賊開南門涉河而遁官軍追抵河干沿途溺斃殺斃不少當將縣城克復丁逆遁往何處著飭韓進春實力追剿一鼓撲滅湖逆由陳坊分兩股一由大路向雲際關一由小路向大呂口洪幅璜馬隊尙多魏喻義扼之於雲際關斃賊極多收降三千餘人該逆越塘坊入石

城境席寶田已督隊前進著左宗棠楊岳斌沈葆楨督飭席寶田魏喻義等軍合力追擊務將洪逆全股悉數殲除毋畱遺孽會昌等練勇已將瑞金縣克復漣逆圍甯都甚急聞鮑超兵至解圍而去到處句添賊黨冀圖接應湖逆盤踞對河之東山壩等處鮑超見已追及著卽檄令緊躡賊蹤毋令與洪幼逆句合以期早日肅清楊岳斌見駐何處病勢諒已輕減著卽趕緊具奏以慰厯繫將此由六百里各諭令知之○諭勞崇光等奏楚黔官軍擊退銅仁松桃逆匪請飭周洪印由荔波會剿並攻克大定府屬兔場賊巢各摺片包茅仙股匪盤踞松桃廳屬之太平營大坪場復分股竄擾長平坑及銅仁府屬卜口場等處經楚省周洪印保慶等軍會同黔軍將兩路賊營蹋毀二十餘座乘勝進攻太平營等處立將賊巢剗平斬馘甚夥該逆由孟溪竄去復經官軍夾擊餘賊四散

鹿境滿清勦辦甚爲得手惟首逆包茅仙迄未成擒該逆分擾黔
楚川邊歷年爲數省之患一經免脫必致餘燼復然著勞崇光張
亮基飭令陳昌運會督松桃文武設法購緹嚴拏務獲並將餘匪
搜捕淨盡毋任漏網松桃毗連四川秀山等處有無餘匪竄入包
茅仙難保不逸入川疆並著駱秉章飭令西秀防兵會合黔軍實
力捕拏以清數年巨患李七股匪自踞伏黔邊疊經楚粵官軍會
剿勢已窮蹙乃楚軍周洪印因防本境中道折回粵軍楊廷桂復
因水土不復全隊撤去以致日久稽誅見在該逆竄至荔波縣屬
拜讓地方全祖凱一軍兵力不敷勦辦而貴定縣城尙爲另股潘
名傑占踞恐其互相勾結必致蔓延著惲世臨懷遵前旨飭令周
洪印迅統所部由荔波一帶進剿並著張凱嵩飭令楊廷桂另選
精銳迅速入黔會同黔楚官軍併力夾擊以期及早殲除毋得稍

分畛域苗匪竄踞大定府之新兔場等處署知府劉正朝等督練
攻破賊巢擒斬千計該匪見分竄郎岱水城平遠各屬州境仍著
飛飭各屬一體集練兜擒務期盡絕根株毋畱餘孽另片密陳副
將曹元興練勇見賊卽潰天柱被陷並不救援縣城克復復捏稟
冒功並有通賊情事卽著該督撫等切實查明設法弋拏正法毋
得以操之太切恐激變端遂令日久養癰貽害此時秋稼業已登
場仍著飭令各該鎮將規取尙大坪壩芒等處老巢埽穴擒渠肅
清邊圉張亮基仍當力疾從公遇事奮勉不可萌頽退之志所有
自請罷斥之處著無庸議將此由六百里各諭令知之○諭麟興
奏遵旨豫籌立界事宜並請帶兵前往請飭晉省撥解餉需廣鳳
等奏俄人侵擾阿勒坦淖爾烏梁海游牧各摺片前據麟興等奏
請飭庫倫將分界原圖咨送伊犁覈辦當經諭令文盛速將原圖

徑送明誼等以備與俄使會議茲據該署將軍奏稱詳查唐努烏
梁海實無唐努鄂拉達巴哈地名其西兩部落盟長地方因游牧
窄小無地可讓未能豫籌安插將來定議分界時如唐努烏梁海
游牧內有應分處所其人戶應移往何處安置均應先事豫籌著
明誼迅卽咨催文盛等將雍正五年已定界址圖記剋期送交俟
該俄使到塔卽按原圖指名辯論能按照總理各國事務衙門前
奏令讓出數百里安插內徙之眾較爲妥善至俄國議分界址自
沙賓達巴哈界牌末處起順山嶺先往西行應若干里至某地名
止後往南行至唐努鄂拉達巴哈俱係由何地地名經過並唐努鄂
拉達巴哈是否卽烏里雅蘇台所屬唐努烏梁海地面並著明誼
等與俄使會議時先行逐一指明繪畫圖誌開載兩國應行推立
鄂博處所以便分界時憑圖定議卽由麟興等與明誼妥籌辦理

麟興侯明誼換約事竣回城卽行前赴沙賓達巴哈一帶建立界
牌所請隨帶委員岳嵩武等及攜帶關防前往之處均著照所議
辦理俄人闖入阿勒坦淖爾烏梁海兩旗游牧地面欺凌擾害業
經廣鳳等知照明誼等辦理卽著明誼行文西悉畢爾衙門令將
兩旗游牧內之俄官等先行調回並將來分界後原住人眾或照
廣鳳等前奏暫令在北八臺等處妥爲安置之處並著明誼廣鳳
奎昌迅籌會辦將此由五百里各諭令知之○予貴州陣亡府經
厯李有容祭葬世職○丙寅賞五城貧民棉衣銀○丁卯以孟冬
時享 太廟 上前期親詣行禮